

SIARAN AKHBAR

Bahagian Hal Ehwal Awam dan
Komunikasi Korporat Kumpulan
Lembaga Tabung Haji
Lantai 16, Bangunan Tabung Haji,
201, Jalan Tun Razak, 50732 Kuala Lumpur
Tel : 03 2054 2132
Faks : 03 2164 0436
Email : bkk@lth.gov.my

Tabung Haji Contact Centre
Tel : 03 6207 1919
Faks : 03 7728 4959

www.tabunghaji.gov.my

TH Anjur Kursus Perdana Haji Musim 1439H/2018M Peringkat Wilayah Persekutuan

KUALA LUMPUR, 30 Jun 2018: Lembaga Tabung Haji (**TH**) menganjurkan Kursus Perdana Haji Musim 1439H/2018M peringkat Wilayah Persekutuan bermula 30 Jun 2018 sehingga 1 Julai 2018.

Majlis perasmian Kursus Perdana Haji Musim 1439H/2018M Peringkat Wilayah Persekutuan ini disempurnakan oleh YBhg. Datuk Seri Mohd Zuki Bin Ali, Ahli Lembaga Pengarah **TH** bertempat di Masjid Wilayah Persekutuan. Kursus ini melibatkan lebih daripada **2,100 bakal-bakal jemaah haji** dari Wilayah Persekutuan. Turut hadir pada majlis ini, Tuan Haji Mohamad Abas, Pengarah **TH** Wilayah Persekutuan.

Kursus Perdana Haji (dua hari satu malam) yang diadakan secara berperingkat di **17** lokasi seluruh Negara pada hujung minggu bermula **29 Jun 2018** sehingga **8 Julai 2018** ini merupakan kursus terakhir dianjurkan **TH** dalam usaha meningkatkan tahap pengetahuan jemaah haji berkaitan ibadah haji terutamanya dari segi praktikal serta platform untuk memberikan maklumat terkini sebelum mereka berangkat ke Tanah Suci.

Bakal jemaah diberikan pendedahan melaksanakan ibadat haji melalui latihan amali secara simulasi seperti bertawaf, saie, melontar jamrah serta amalan dan beribadah secara berkumpulan. Simulasi secara berkumpulan ini memberikan pendedahan terhadap situasi di Tanah Suci yang akan dikunjungi oleh jutaan umat Islam dari seluruh dunia.

TH ingin mengingatkan kepada bakal-bakal jemaah haji untuk tidak meletakkan sebarang ekspektasi tinggi, terutama ketika kemuncak ibadah haji di Arafah, Mudzhalifah dan Mina (Masya'ir). Ini kerana kebanyakan daripada perkhidmatan yang disediakan sewaktu Masya'ir ini tertakluk kepada pihak ketiga di Arab Saudi. Justeru, bakal-bakal jemaah haji disarankan untuk bersabar dan istiqamah, seterusnya menumpukan sepenuh perhatian kepada ibadah haji meskipun berhadapan dengan pelbagai cabaran dan kekangan sepanjang keberadaan di Tanah Suci.

Kursus Perdana Haji dijalankan dengan bimbingan dan tunjuk ajar oleh lebih **120 orang** Pengkursor Ibadat Haji Tanah Air (PEKTA) Negeri / Daerah dan Pembimbing Ibadat Haji (PIHTAS) yang memperolehi pentauliahan khas Mengajar Haji dan Umrah daripada **TH**. Kursus ini turut diselai lebih **600 orang** petugas haji yang akan bertugas di Tanah Suci.

Bakal jemaah haji juga dinasihatkan untuk membuat segala persediaan lain untuk ke Tanah Suci seperti memantapkan stamina diri dengan melakukan aktiviti riadah dan kecergasan, penjagaan kesihatan melalui pemakanan dan pengambilan vitamin serta penyediaan barangan keperluan yang mencukupi seperti yang disarankan oleh **TH**. Sepanjang berada di Tanah Suci, bakal haji juga dinasihatkan untuk mematuhi peraturan oleh **TH** dan pihak kerajaan Arab Saudi demi kebaikan bersama.

Selain Kursus Perdana Haji, **TH** turut melaksanakan beberapa kursus haji seperti Kursus Asas Haji, Kursus Intensif Haji dan Kursus Khas Haji bagi warga emas. Kursus-kursus ini merupakan antara program pendidikan dan bimbingan yang disediakan oleh **TH** secara percuma dalam membantu meningkatkan pengetahuan khususnya ibadah haji kepada bakal jemaah Malaysia. Penganjuran kursus-kursus ini melibatkan anggaran kos **RM5 juta** seluruh Negara dan merupakan antara program tanggungjawab sosial korporat (CSR) **TH**.

-Tamat-

Lembaga Tabung Haji

Lembaga Tabung Haji (**TH**) adalah sebuah badan berkanun yang diperbadankan di bawah Akta Lembaga Tabung Haji 1995 (Akta 535). Aktiviti utama **TH** adalah dalam pengurusan haji, tabungan dan pelaburan. Antara sektor pelaburan terasnya adalah kewangan Islam, perladangan, hartanah, pembinaan, teknologi maklumat, minyak & gas, hospitaliti, perkhidmatan dan makanan halal. **TH** mempunyai 126 buah cawangan di seluruh negara. Untuk maklumat lebih lanjut mengenai perkhidmatan Tabung Haji, sila lawati www.tabunghaji.gov.my atau hubungi Tabung Haji Contact Centre ditalian 03-6207 1919.